



Ս Փ Յ Ո Ւ Ռ Ք Ո Ւ Մ

ԿԱՐԴԻՆԱԼ ԱՂԱՋԱՆՅԱՆԻ ԱՅՅԵԼՈՒԹՅՈՒՆԸ

Գրիգոր կարդինալ Աղաջանյանը եկած է Ամերիկա, Պոստոնի արքեպիսկոպոս Քըշինկի հրավերով: Ան հոս մնալու է երեք ամիս, այցելելով հայ կաթոլիկ համայնքները:

Եթե այս երկրին մեջ բնակող սակավաթիվ հայ կաթոլիկները բավարարություն կգտնեն կարդինալը տեսնելով, այդ իրենց գիտնալիքն է: Նմանապես, եթե կաթոլիկ նվիրապետության մեկ անդամի հրավերով ուրիշ մը կճամբորդե, այդ ալ սովորաբար մեզ չի հետաքրքրեր: Զոր օրինակ, Նյու-Յորքի Ֆրենզիս կարդինալ Սփելմանը այս պահուն գացած է Արգենտինա, մի ինչ որ արարողության մասնակցելու, բայց այս միջանկյալ հիշատակումեն զատ, ատով զբաղելու կարիք չենք զգացած:

Կարդինալ Աղաջանյանի պարագան տարբեր է, քանի որ ան հայկական ծագում ունի, և իր դաշտը հայկական իրականությունն է:

Հոս գալեն առաջ, կարդինալ Աղաջանյանը այցելեց Ֆրանսա: Իր հոն երթալը տխուր անդրադարձում ունեցավ Ֆրանսահայ գաղութին վրա: Ոմանց բարեմիտ կարծիքով, պարզ «զուգադիպություն» էր, որ նույն ատենները շարք մը ցավալի իրողություններ տեղի ունեցան հոն: Կրնա ըլլալ: Բայց արտակարգ «զուգադիպություն» էր, որ ճիշտ այդ օրերուն՝ Ֆրանսայի մեջ՝

- ա) Հայաստանյայց Եկեղեցիի Ֆրանսայի թեմը էջմիածինեն անջատելու ջանքերը սաստկացան:
- բ) Հոգաբարձությունները բռնի հրաժարեցնելու փորձեր եղան, որպեսզի անոնց տեղը անցնին էջմիածնի և Հայաստանի թշնամի տարրեր:
- գ) Առաջնորդ Արտավազդ արքեպիսկո-

պոս Սյուրմեյանը հալածվեցավ, երկրեն արտաքսման հրաման ստացավ և հանկարծամահ եղավ:

դ) «Ազատ խոսք»ը կառավարության կողմե խափանվեցավ, որովհետև խաղաղությունը կջատագուվեր, Սովետ Հայաստանի իրականությունը կժանոթացներ, և էջմիածնի հեղինակությունը պահել կուզեր:

ե) Դաշնակ տեռորիստները ավելի սանձարձակ դարձան:

զ) Հայոց դեմ իշխանությանց կողմե զսպիչ միջոցներ ավելցան:

Ֆրանսահայ գաղութի ներկա կացությունը վերհիշել կուտա Լեհաստանի և մոտակա երկիրներու հոծ և բարեկեցիկ հայկական համայնքները, որոնք երկար ատեն պահեցին իրենց ինքնությունը, Հայրենիքի սերը, հայերեն լեզուն և Ազգային Եկեղեցին: Անհանդուրժող Պասպական Եկեղեցին ջանաց ամեն կերպով լուծել այդ գաղութները և մանավանդ բռնի ուժի միջոցով, ան գրավեց հայկական եկեղեցիները և արգիլեց հայերեն լեզուն:

Թերևս հուսացողներ ըլլան, որ Ֆրանսայի մեջ պատահած «զուգադիպություն»ը Ամերիկայի մեջ կրկնվի: Բայց անոնք գիտնալու են, որ Ֆրանսայի մեջ տարված «հաղթանակ»ը խաբուսիկ և ժամանակավոր է և հուսախաբ պիտի ըլլան հոս անոր կրկնությունն ակնկալելով:

Կարդինալի հոս ժամանումը կպարտադրե խորհրդածել իր անձին և իր ներկայացուցած հաստատության կապված հարցերու վրա:

Նախ՝ ի՞նչպես եղավ, որ Գրիգոր Աղաջանյանը կարդինալ նշանակվեցավ:

Փաստարկողներ կան, թե ան այնքան

հմուտ ու իմաստուն էր, որ Պապը ստիպվեցավ արժանիքը ճանչնալ և կարողնալուց շնորհել իրեն: Բայց սա սխալ ենթադրությունն է: Կաթոլիկ Եկեղեցին միշտ առաջնորդված է քաղաքական նկատումներով, ուժի և արդյունքի հաշիվներով: Ան կարողնալ շրջեր անձ մը, եթե անոր ետին չկան առնվազն հինգ միլիոն կաթոլիկ հավատացյալներ, և կամ թե որոշ ակնկալություններ չունի անկե:

Գրիգոր Աղաջանյանը այս ստորագելիներեն առաջինը — ուժը չուներ, քանի որ ոչ ավելի քան քառասուն հազար պապադավան կա հայերուն մեջ: Ուրեմն, Վատիկանը արդյունք մը կակնկալեր՝ անոր նվիրելով կարողնալի կարմիր գլխարկը:

Այդ ակնկալության մեկ մասն էր հայոց հայրենահավաքին վնասելը: Գրիգոր Աղաջանյանը՝ կարողնալի գլխարկը գլխին վրա դնելով, այդ ուղղությամբ իր կարելին ըրավ, բայց հայրենադարձ հայությունը իր խորհուրդին չանսաց:

Վատիկանը տակավին ուրիշ բան կակրնկալեր իր հայախոս ծիրանավորեն: Դարեր շարունակ Հռոմը ջանացած էր պառակտել և իրեն հպատակեցնել Հայաստանյայց Եկեղեցին, բայց չէր հաջողած: Բոլորված իր Ազգային Եկեղեցին շուրջ, հայ ժողովուրդը երբեք նպատակ չուներ խոնարհելու օտար կրոնապետի մը առջև, և ընդունելու անոր ազգամերժ վարդապետությունը: Միայն դուզն թվով դավանափոխներ հարեցան Վատիկանի: Իսկ ներկայիս, Հռոմը կհուսա իրագործել՝ իրմե միշտ խուսափող այդ նպատակը, օգտվելով ռազմատենչ մթնոլորտեն:

Բայց Պապը տակավին ավելի մեծ նպատակ ունի: Ան կուզե իրեն հպատակեցնել, հայկականեն զատ, Մերձավոր Արևելքի մյուս եկեղեցիները (Ղպտի, Ասորի, Եթովպական և այլն), որոնք քրիստոնեության սկզբնական շրջանեն ի վեր անկախ գոյություն պահած են: Այս կացության բանալին Հայաստանյայց Եկեղեցին է: Եթե այս հաղթահարվի, մյուսները հաղթահարելը մեծապես կդյուրանա: Ահա Գրիգոր Աղաջանյանեն իբրև կարողնալ ակնկալված արդյունքը:

Առ այդ, կարողնալ Աղաջանյան կհեղհեղե «հերձվածողներու վերադարձը» կոչված Պապականության տաղտկալի հանկերգը, ըստ որում ինքն է միայն ճշմարիտ հավատքի վրա հիմնված իսկական եկեղեցին, իսկ մյուսները՝ սխալի մեջ թավալող «հերձվածողներ»:

Դավանանքի խնդիրները մեր նկատառության սահմանեն դուրս են, և մենք վեճի չենք բռնվիր աստվածաբանության մասին: Բայց այս առթիվ ի պատասխան այդ հանկերգին, պարտավոր կզգանք ըսելու կարողնալ Աղաջանյանին և Պապականության ուրիշ հայախոս մունետիկներու՝ «Պարապ խոսք և փունճ փաստարկություն»:

Եթե հերձվածող մը կա, եթե քրիստոնեության ուսմունքը խեղաթյուրող մը կա, ան ալ Կաթոլիկ Եկեղեցին է, որու նվիրապետության փառամոլությունն ու ընչաքաղցությունը չափ ու սահման ունեցած չեն, դարերու տևողության, մինչև մեր օրերը:

Պատմականորեն անճիշտ, անհիմն ու սնանկ է Կաթոլիկ Եկեղեցվո այն հավակնությունը, թե ինքն է ուղղափառ և վավերական Քրիստոնեական Եկեղեցին: Հայաստանյայց Եկեղեցին, զոր օրինակ, առնվազն նույնքան իրավունք ունի ինքզինք նկատելու ուղղափառ, վավերական, առաքելական և ոչ հերձվածող, որքան ուրիշ որևէ եկեղեցի:

Հայ ժողովուրդը, անցյալ հազար տարիներուն, գիտցած է թափանցել լատին եկեղեցիներու մանվածապատ մեքենայություններեն ներս, դժվարին պաշքար է մղած անոնց դեմ, և էականին մեջ պարտության է մատնած զանոնք, հավատարիմ մնալով իր Հայրենիքին և իր ավանդական Եկեղեցվուն:

Ներկայիս մեր վերածնող Հայրենիքի փառահեղ իրականության ի տես մանավանդ, հայ ժողովուրդը դարձյալ պիտի ճանչնա կարողնալ Աղաջանյաններուն արտասանած մեղրածորան բառերուն մեջ թաքնված ազգակործան և եկեղեցակործան թուլնը, և դարձյալ պիտի գիտնա պարտության մատնել Պապականության նպատակները:

(«ԼՐԱՔԵՐ», 27 նոյեմբերի, 1951 թ.):

